

# KIRBEPREDIGT 2009

Achtung, Achtung, ned verzaga,  
au wenn die Kirb' zu Grab' wird traga.  
Denn grad heut' am letzta Tag,  
horchet zu, was i Euch sag'!  
Wisst Ihr no, was alles war,  
bisher en dem Kalenderjahr?

Liebe Bürger, konzentriera!  
Heut' müsset Ihr hier ned lang friera!  
Hend ons vom Rathaus saga lassa,  
dass mir ons müsset kürzer fassa.  
Sei bloß a Wunsch ond gar koi Zwang,  
doch d'letzte Predigt war zu lang!  
Seid ons ned bös', doch s'rieht a Spur,  
nach einer kleina Staats-Zensur.  
Doch wenn ons rügt die Obrigkeit,  
dr Kirbebua Gehorsam zeigt!

Ihr wisset jo, au en dr Kürze,  
liegt durchaus a gewisse Würze!

## ***So viel Buaba***

### ***die sinnlos huaba.***

#### ***Verbrenn mr dr Sarg***

#### ***Ond vergrab mr dr Kuacha!***

Ich hab' zom Auftakt ungeniert  
mich mol uff Benninga konzentriert:

War's a Freude oder Qual,  
Em Juni die Gemeind'rats-Wahl?  
Scheint's hend's viele doch verpennt,  
Wahlbeteiligung: 57 Prozent!  
Ischd des Verdruss an Politik?  
Äußert dr Wähler so Kritik?  
Oder hend die hübsche Kandidata-Gestalta  
en mancha von dr Wahl abg'halta?

Jedenfalls, es war ned schö'  
für CDU ond SPD!

Bei dr Wahl do stahl die Schau  
eher schon die FWV!  
Paar Neue nei, paar Alte raus,  
so zoget se ein ins „Weiße Haus“,  
wie mr s'Rathaus vehement  
neuestens em Volksmund nennt.

Auf Warthon muss mr jetzt uffpassa,  
bestimmte Dinge ned zulassa.  
Ned dass der wie dr Clinton Bill,  
plötzlich a Praktikantin will,  
die ihn persönlich unterstützt  
ond au em „Oval Office“ nützt.  
Auch einen „Beraterstab“  
für Warthon lehn' ich deutlich ab.  
Glaub' au, sei Frau sich von ihm trennt,  
wenn er „First Lady“ sie jetzt nennt.  
Ich denk', es macht ihr au Verdruss,  
wenn sie mit ins „Camp David“ muss,  
des, wenn Du realistisch bischd,  
bloß d'Holzütte em Hardtwald ischd.

Ihr denkt vielleicht, der Pfarrer spennt,  
der malt dr Teufel an die Wänd'.  
Doch eigentlich ischd's scho passiert,  
mir send scho „amerikanisiert“!  
Em Blättle stand: „JUCA erneuert!“  
Am Wochenend' wird „Spring Break“ g'feiert!“

## ***So viel Buaba***

### ***die sinnlos huaba.***

#### ***Verbrenn mr dr Sarg***

#### ***Ond vergrab mr dr Kuacha!***

Hüftschwung, Suplex, s'Füaßle stella,  
d'Gegner hend's ned glauba wölla.  
Beinschere, Klammer, Niera-Presse,  
so kriegsch d'Gegner auf die Fresse.  
Schnappa, rom, uff d'Schultern batscht,  
s'Publikum euphorisch klatscht!

Potzblitz, die starke Jungs vom Ringa,  
dean langsam alle Grenza sprenga.  
Mit Kopf ond mit dr Muskelkraft  
hend se doch glatt dr Uffstieg g'schafft!  
Bis zum Schluss zittert, dann a G'schrei:  
Sie send dren en Liga Zwei!

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Glaubet's mir, denn es ischd wahr:  
zwei „Instanzen“ 100 Jahr!

Beide send, wie sagt mr's gleich,  
ang'siedelt em „Sozialbereich“.  
Sozusaga eine nette  
„Austausch- ond Begegnungsstätte“,  
mit Holzbänk' ond –tisch ausstaffiert,  
wird au a „Speisung“ dort serviert.  
Ihr wisset ned, von was ich red?  
Ja Menschenskind, seid Ihr denn blöd?

S'Schulhaus hat Geburtstag g'feiert,  
ond wurde au glei' ronderneuert:  
neues Dach, Vollwärmeschutz,  
ond dazu en neua Putz.

Ach, jetzt fehlt no Nummer zwei.  
Ja Leut, des kann bloß d'Krone sei!  
Andere Kneipa send verschwonda,  
d'Krone hat alle überwonda!  
Mit Braten ond Salat vom Acker,  
steht zu Diensten: Lore Wacker!  
Hat manchen Gast scho überlebt,  
der durstig scho weiter oba schwebt.  
Dort hend scho viel, an gute Tage,  
gottsallmächtige Räusch' heimtraga.  
Ohne Ausnahm', au Prominenz,  
scho damals bei dr Frieda Lenz.  
Sie konntet ihr'n Nama nemme saga,  
beim heimgeh' hat sie's d'Trepp' nag'schlag!

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Ich hab jo dacht, ich häb schlecht g'seh,  
„Oettinger“ ischd en Benninga g'wä.  
Dr Landesvater en dr Kelter,  
von „globaler Welt“ erzählt er,  
ond au von dr Wirtschaftskrise,  
d'Konten seiet en de Miese,  
dr Filbinger nachträglich g'lobt,  
worauf die Presse hat recht tobt.

Doch irgendwas ischd do passiert,  
was die Merkel hat frustriert.  
War er ihr halt doch zu sehr Prinz,  
do bei ons en dr Provinz?  
Jedenfalls wird er ersetzt,  
ond nach Brüssel wegversetzt.  
Kann der, des frag ich mich noch,  
außer Schwäbisch no a Sproch?  
Ond was no interessiera dät:  
Kommt jetzt wieder Lothar Späth?

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Lasst em Zeitraffer no seh',  
was sonst en Benninga ischd g'wä:

Do war der „Neujahrsempfang“,  
mit dem intensiva Drang,  
stondalang viel Leut' zu ehra  
ond etliche Viertela zu leera.

Genauso der „Neubürger-Abend“,  
an Wein ond Brezla sich erlabend,  
werdet d'Neubürger informiert,  
ond auf Benninga justiert.  
Sie werdet praktisch unverfrora,  
uff d'Benninger Kultur eing'schwora.

Des nennt mr, so wie ich des sieh,  
doch „Corporate Identity“!

Renoviert, mit neue Stühle,  
gibt's wieder s'Hotel Neckarmühle.  
A Hotel em Ort ischd richtig,  
ond für manchen au ganz wichtig.  
Denn sollt daheim die Luft mol brenna,  
kannst auszieh' ond em Hotel penna!

D'Geschwindigkeit wurd' öfter g'messa,  
viel hend scheint's s'Limit glatt vergessa!  
Wegen dene z'schnelle Hampel,  
gibt's bei dr Krone noo a Ampel!

S'S-Bahn-Parkdeck leidet Quala,  
do wütet nämlich die Vandala!

Dr halbe Bauhof kräftig sengt (singt!)  
Weil Opel-Lenz s'neu Auto brengt.

D'Gemeinde fordert wieder auf,  
zom 4. Benninger Fleckalauf.

D'TSV-Halle ischd verschwonda,  
die Bahnhof-Baustell überwonda,  
s'Sanierungsgebiet „Ortskern II“,  
ischd endlich wieder sperrungsfrei!

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Was außerhalb dr Benninger Welt  
passiert ischd, des ischd schnell erzählt.  
A paar Ereignis waret's doch,  
ich probier's dr Reihe noch.  
Ond i schwätz au ned so viel,  
ich mach es Euch im „Steno-Stil“!

Energiereserva em Winter knapp,  
Russland dreht dr Gashahn ab!

Airbus dramatisch notgelandet,  
ond auf em „Hudson River“ g'strandet!

Am 20. Januar ischd's passiert,  
Obama wird ins Amt eing'führt!

Danach kommt wirklich ebbes Wahres:  
„Notleidende Banken“ wird Unwort des Jahres!

Bahnchef Mehdorn bespitzelt Mitarbeiter,  
Märklin pleite, s'geht ned weiter!

„zu Guttenberg“ steigt zom Minister auf,  
in Winnenden ischd Amoklauf!

Abwrackprämie auf der Kippe,  
ond Ausbruch von dr Schweinegrippe!

Während mr „60 Jahre Grundgesetz“ genießt,  
parallel dr Hertie schließt!

En Wolfsburg dean se „Meister“ feiern,  
ond Gomez wechselt grad zu Bayern!

Mikael Jackson's Leba z'end',  
„The King of Pop“ in „Neverland“!

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Weil Porsche ond VW sich zerfa,  
muss Wiedeking sei Handtuch werfa!

Leichtathletik mit Usein Bolt,  
der holt en Berlin viel Gold.  
Ond au Steffi Nerius,  
macht mit ,ner Goldmedaille Schluss!

„Herstellungsverbot“, über Nacht:  
Dr Glühlamp' wird dr Garaus g'macht!

A Mann zeigt echt Zivilcourage,  
beschwichtigt derbe Kids in Rage,

doch anstatt dass die sich jetzt zügeln,  
sie ihn zum Dank zu Tode prügeln!

Em coola Flavio Briatore,  
macht d'Formel 1 jetzt heiße Ohren,  
weil er völlig ungeniert,  
taktisch Unfäll' zelebriert!

Bundestagswahl, Ende September!  
SPD, do you remember?  
Bestimmt, denn s'war prozentual,  
seit dem Krieg dr tiefste Fall.  
Schwarz-Gelb ischd jetzt d'Koalition,  
aus FDP ond dr Union.  
Scho nimmt d'Opposition recht kromm,  
dass d'Merkel reist gleich ganz viel rom.  
Ich glaub, die warnt halt auf die Schnelle,  
die Welt vor Guido Westerwelle!

Guido, mach's doch wie Hermann Maier,  
denn der zeigt em Oktober Eier,  
beim Ski tritt er em größta Glück,  
als „Herminator“ stolz zurück!

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Daneben gab's no wilde Sacha,  
die waret s'ganz Johr ned zum Lacha:

En Mode war, so oft wie nie,  
s'Jahr über die Piraterie!  
All' Woche hend die ganz vermessa,  
a Schiffla kapert, dann erpressa,  
ond bliebet au no unentdeckt,  
a Tanker ischd jo glei versteckt!  
I hab immer bloß vernomma,  
sie hend ihr Lösegeld bekomma.  
Mr müsst halt zahla, könnt nix macha.  
Do kann mr bloß no drüber lacha!

Die Banken waren über Wochen,  
von de Finanzspritza scho völlig zerstoichen!

Gestützt von onserm Steuergeld,  
hält aufrecht sich d'Finanzenwelt.  
D'Manager hend au soo g'litta,  
dass se um eine „Boni“ bitta,  
für die Last, die sie so traga.  
Mensch, do könnt' ich glatt neischlaga!

Egal wann'd machsch dr Fernseh an:  
Kabul in Afghanistan!  
Überfall, Bomba ond Ermorda  
ischd dort scheint's zom Volkssport worda.  
Gegen dr böse Taliban,  
kommt anscheinend koiner an.  
weder Amis noch BRD,  
viele Soldaten send scho he.  
Dr Präsident hat bei de Wahla b'schissa,  
koiner dät des Land vermessa,  
wenn's ned strategisch wichtig wär,  
deshalb fällt dr Abschied schwer.

**So viel Buaba**  
**die sinnlos huaba.**  
**Verbrenn mr dr Sarg**  
**Ond vergrab mr dr Kuacha!**

Doch g'nuag jetzt, d'Predigt ischd vorbei,  
sonst schickt dr Schulteß d'Polizei!  
Ich darf jo heut ned überzieha,  
sonst müsset d'Kirbebuaba flieha!

Also Leut, jetzt flott bewegt,  
onsre Bomba send scho g'legt,  
Ableger aus Afghanistan,  
aus guatem Draht zom Taliban.  
Setzet d'Sonnabrilla uff,  
sonst strahlt Euch dr Atom-Blitz druff.  
Des wär jo schad', wenn ihr erblindet,  
ond nachher Bier ond Schnaps ned findet.

Ich hoff, s'hat g'falla, würd ons freu'n,  
d'Kirbe em Johr 2009!

AMEN